

185

DEO OPTIMO MAX.
UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA.

QUOD LIBETARIIS DISPUTATIONIBUS;
*manè discutienda in Scholis Medicorum, die Jovis decimâ-quartâ
mensis Decembris, Anno Domini M. DCC. XLVII.*

M. CAROLO - LUDOVICO LIGER,
Doctore Medico, Præsîde.

An Arthritidi Sapo?

I.



RBANAS inter gentes morbus frequens, voluptatis proles, doloribus atque cruciatibus, in quavis ut plurimum articulatione, mortales dilanians, Vere & Autumno, paroxysmis eheu longioribus! Sæpius recurrens, à Græcis nuncupatur arthritis. Ab hac autem quam opprimit partem, nova sortitur nomina; quapropter varias ipsius species describas potius, quam morbum! Protheum definias. Arthritis Regulari quoties patet incesu, lympham in articulis degentem, synoviam nomine insignitam, aut tendonum vaginis inclusam, partium lubricationi intervenientem plerumque corrumpit; modò torporem concilians, infarctus & trepitationes procreans, sensim extremitates invadit, modò stipata doloribus atque tumore comitata, repente unoque ictu in articulos sævit. Si manum carpum-vè, aut externam partem, aut digitorum articulos infestat, chiragra dicitur. Si malleolos, talos, pedum, maxime verò pollicis commissuras adoritur, podagra. Ischias verò, si ossi sacro, ischio, aut summis natibus partibus-vè ambientibus inhæret. Nec satis est arthritidi tantum humano generi bellum inferre. Proh fatum! Quot quantasque strages edat, ubi irregularis seu anomala læcessit, vix credibile. Pandora pixidem rectè appellaveris; quæ morbi cujuslibet larvam mutuatur. Pravo cuilibet affectui ansam præbet. In caput sedem figit: Agmine facto ruunt angina, cephalalgia, phrenesis, apoplexia. Dædaleos ubi pulmonis anfractus percurrit, tussis excitat, asthma procreat, pleuresim utramque mentitur. At si variis cum liquoribus tum secretis, tum lubricationi viscerum in abdomine contentorum consecratis connubium faciat arthriticus humor; malorum illadem secum ipsis importat. Præstò sunt cardialgia, nausea, vomitus, tormina, colici dolores, obstructions, inflammationes, phrenitis, &c. Triplex anomalie distinguitur species: vaga, quæ trunci costarumque articulationes obsidet, indeterminata, quæ omnibus simul & cunctis partibus ex æquo minatur, devia tandem singulas viscerum functiones perturbat. Non adeò furit paroxysmis prioribus arthriti, imbecilliores plerumque occupat artus; in extremitates à corde remotiores, vim sanguinis valde imminutam recipientes suum exercet imperium, non missurum, nisi negato in articulis hospitio. Nec irregularem nisi vetustate, casu aut incuriâ morem adipiscitur. Omissis omnibus causis, à Veteribus in articulari morbo cognitis, in medium proferam sanguinis inspissationem, tumoribus excitandis maxime aptam frigidamque morbi qualitatem præ se ferentem; altera verò ab humorum acrimoniâ originem ducit, calore, rubore, irritatione partis malè affectæ innotescit, calidaque nuncupatur. Utraque modò seorsim, modò viribus unitis præliantur; nec tamen curantibus tantum facesserent negotium, absque ullâ peculiari quâdam arthriticâque humorum Crasi à naturâ alienâ. Recens huc usque curatu facilior habetur, inveterata & nodosa difficilior, teste Ovidio,

Tollere nodosam nescit Medicina podagram.

Hæreditariam expugnabis rariùs, nisi sanguinem spissum crassumque attenues, tumores discurias, acrimoniam humorum obtundas, arthriticumque miasma foras amandes

non remedium farragine; sed unico, partibus oleosis salibusque alkalinis constante, saponis nomine insignito, cunctis facies satis.

I - I.

NULLUM immerito corripit articularis morbus. Opimo victu, eleganti, gulæ irritamentis delectatur; olera quæcumque vitamque agrestem respuit. Otio gaudet & oppidis; rusticatur nunquam nec terram exarat. Divitum palatia, eruditorum musæum habitat; pauperum verò parit tabernis. Quantum ex deliciis surgat amari, apprimè suo periculo callent arthritici. Præteritam frustra lugent felicitatem, ipsi frustra valedicunt, dum voluptatibus aut gulæ pendunt vectigal, iterum atque iterum statis temporibus persolvendum. Neque enim usquam podagricis certa quies; inviti quot sunt, malorum volvuntur oceano, & cunctis suus imber imminet. Dolenda quippe ipsorum conditio, quories plectuntur, at ipsis timendum quandiu quiescunt. Primarias Arthritidis causas perpendenti, proximam in senibus esse sanguinis inspissationem, ulterò patebit, ob defectum in motu circulatorio, imminutas vires labefactasque concoctiones; liquores enim nostri à motu præsertim & calore suam tenent fluiditatem. Idem vitium contrahit sanguis in helluonibus, quibus, esculentis variis valentioribusque cibis stomachum gravare volupe est, ut ait Horatius, Sat. 2.

..... cum simul assis

Miscueris elixa, simul conchyliis turdis

Dulcia se in bilem vertent, stomachoque tumultum

Lenta feret pituita.

Imperfecta semper eorum digestio, crassum viscosumque succum, reparandis jacturis cheu! Copiosorem minimèque aptum suppeditat. Otium nonnunquam & labor improbus, seu studium, humorum vitiant indolem; non uno quidem eodemque tenore suas agunt partes. In otio succorum corporis recrementa quæ priùs excernebantur, in vas reconduntur. Meditationibus seriis ac diuturnioribus, spiritus defæcationes ac volatiles à concoctionum penso, quod debuerant absolvere, nimium avocantur. Quàm malè salutis suæ consulunt, qui calori juventutis obsequentes, aut vegetissimo robori nimium fidentes, Veneris ludos frequentant. Effrenatâ morum licentiâ præmaturiùs senectutem accersunt. Brevi enim franguntur eorum membra labore, debilitantur nervi, spirituum animalium fit penuria, nobilioribus balsamicisque suis partibus sanguis defraudatus, nihil nisi acrimoniam, acorem, acidum-ve redoler. At cunctos homines agitat non una cupido, sunt quos pleno juvat potare de die variisque liquoribus spirituosus gustum recreare. Quantum inspissando sanguini valeant acida, quantum ipsi acrimoniam concilient, neminem later. Liquores & vina acidis superabundare chemia demonstrat, lacteos humores coagulare evincit experientia. Cuncta Bacchi munera omnibus nocere cave credas. Iis, Campanis atque Burgundis rudè frui licitum est, quamvis patrio liquori plurimum indulgeant atque bacchanalia vivant. At unde discrimen? Paucis accipe. Burgunda vina atque Campana principiis sibi invicem exquisitâ proportionem aded unitis constantur, ut arte quâlibet non facilè à se invicem queant disjungi. Cætera verò acidis partibus aded turgent, ut in doliorum parietibus magnâ copiam, sales suos sub tartari nomine incrustent, operâque facili deponant. Quâcumque verò causâ sanguis inspissetur, aut acrimoniam donetur, aut utroque vitio simul imbuatur, in stomachum, viscera primariaeque vias imperum faceret; nec nisi peculiari humorum crassi, quam *miasma* arthriticum voco, visarius in articulis decumberet. Fonte licet eodem hauriantur corporis humores, nedum varii diversis sint morbis obnoxii, imò iidem, variè corrupti diversos pro modulo morbos procreant. Pars enim fibrosa seu lymphatica semen succosque nutritios corrumpit, ubi lue venerè inficitur. Lympha verò eadem arthritico *miasmate* vitiata articularum humores, aliosque iis congeneres inquinat, tenaciores, viscosiores, acriores, erodentes reddit. Fernelius asserit pituitam caloris vi & appulsu tantam adipisci crassitudinem, ut à lapidis aut gypsi naturâ non procul absit. Hanc sæpe deprehendisse testatur in pulmonibus aut articularum digitis. Ab his omnibus fibrarum distorsiones, articularis motus aberrationes, inertiam, infarctus, tumores, dolores acerbos podagrâ laborantibus supervenientes repetere ne graveris.

I I I.

QUOTIESCUMQUE alkalinis salibus fixis vegetantium olea quælibet arte chemicâ, aut naturâ intimè conjunguntur, massa residua libero acri concrescens, indurefcens, in aquâ solubilis, Sapo nuncupatur. Ut tamen desideratos præstet effectus, certam requiri alkali cum calce vivâ parari, atque acidi proportionem usus edocuit. Quot quantaque ex hac combinatione procedant miracula, mirum dictu. Oleum pristinum pinguem naturam amittit, novam aquæ amicam induit. Vim autem suam deprædantem atque corrosivam exuit sal alkali fixum. Compositum hoc inquit Boerhaavius, calore, motu & contritu solvit gummosa, oleosa, resinosa, pingua inspissata, reddit eadem quoque saponacea sive solubilia in aquâ. Hinc abluit, detergit,

3
 cluit, aperit, mundat, resolvit. Coagulatis quasitam restituit inéabilitatem. Eâ re inveteratas referat obstructions, perditumque iis partium usum restituit. In concreta, amurcosea ex terrâ coalescentia & oleo pulchra quoque præstat. Obstat quin etiam acidis, ne cogant chylum, vel lac; imò & his acido densatis iterum resolutionem offert. Unde apparet quoddam ferè sit aperiens, attenuans, resolvens, dissolvens universale in corpore humano, quoties memoratis de causis laborat. Ast quantum debellandis furoribus arthritidis conducatur Sapo, ex ipsius principiis eruas facile. Olea nativa, humorum acrimoniam obrundendi, demulcendi vim obtinere planum est. Sanguinis inspissationem salibus cedere; crassos viscidosque succos salibus attenuari, dilui, dissolvi constat experientia. Præstantiores effectus, tutiores promptioresque edere saponem, quis non judicet? Olea sale turgentia cum humoribus miscentur facilius, eisdem inter se magis analagos efficiunt, fluiditatem, dulcedinem ipsis conciliant; hinc circuitum suum perfectius absolvit sanguis, in minimis vasis nullas trahit moras, statutas juxta leges sunt secretionis quælibet, stat æquilibrium à quo pendet sanitas. Sal alkali partibus oleosis involutus ad sanguinem facilius pervenit, minimos pervadit mazendros, in obstructis vasis sibi viam aperit, densos humores dividit, lympham morantem in circuitum agit; hinc tumorum discussio, resolutio, dolorum mitigatio, quies, bona valetudo. Arthritidi curandæ impar foret quodcumque medicamen virtute saponacea orbatum; hoc solius saponis opus. Ipsi licet cunctos corporis meatus perlustrare, organicas partes peragere, absque ulla suæ virtutis deperditione. Serpit quocumque, repat, rimatur; nec de suo, nisi in salutis aut ægrorum commodum impendit. Semper sortitur effectum, urinam movet, perspirationem excitat, sudores provocat. Quo tandem vergit natura hanc insequitur. Ventriculum, intestina primariaeque vias, ab impurâ colluvie ex imbecillioribus aut pravis digestionibus ortâ alvum laxando expedit, à sabarrâ liberat: sicque podagram ab ipsis incunabulis expugnat & expellit. At ubi in extremitatibus se recipit atque nidulatur arthritidis, tumoribus, gypsis, tophis, nodisque artus deturpat, pereunte motu incurvat; externè applica saponem; resolvit tumores, aerem in nodis inclusum expandendo, foras tophos attrahit, redit sua membro deperdita flexilitas, usus, mobilitas.

I V.

SAPONEM laudatis dotibus instructum curandæ Arthritidi parem fore, quis dubitet? Equis flocci faciat remedium, quod suadet ratio, probat auctoritas, indicat analogia, experientia confirmat? Podagra, inquit *Hippocrates*, latius curata, diuturnis & purgantibus tractanda. In ipsius consensum venere plerique medendi peritiâ commendabiles. Quæ verò tentarunt medicamina, ea ipsis feliciter successisse narrant, quæ amaritudine & sale pollerent. Quin imò scopum tutius attingunt ea, quorum principia, analysi factâ, ad Saponem propius accedunt; ut præ cæteris *Chamedrys* idcirco *ira arthritica* vocata. Iisdem remediis, analogiâ ducti, renum calculos aut vesicæ dissolvere conati sunt. Arthritidem cum calculosâ passione passu eodem procedere ominabantur ultro, nec immerito. Licet *Sydenhamus* podagrâ diu vexatus litere non dijudicaret, calculum tamen & Arthritidem ejusdem materiei morbificæ participes esse, atque sese invicem procreare subodorabatur. Dubium solvere gloriatur *Guanerus* his verbis: « Summè calculosa passio dominam arthriticam diligit, & tantam simul » habent affinitatem, ut una sine aliâ rarissime invadat. « Hanc sententiam confirmat *Ramazzinus*. Nephritis quoque & Arthritis, quæ vitæ sedentariæ pedissequæ sunt, litteratorum morbis se jungunt comites; perraro autem quis arthriticus est, quin fiat nephriticus; quia utriusque affectus eadem est materialis causa. *Erasmus* calculo laborans ad amicum suum arthriticum scripsit se & amicum illum esse affines, imò cognatos, duarum quippè sororum maritos, ac illius uxorem sibi intimè jungi absque ullâ adulterii suspitione. At si concreta ex utroque morbo producta arte chemicâ probaveris, iisdem omnino principiis constari deprehendes: eandem salis volatilis, olei quantitatem suppeditant, eandem aeris copiam explodunt. Si tanta sit inter utrumque morbum & ex omni parte necessitudo; equis eandem in administrandis remediis rationem necessariam esse inficias eat? Saponem, Gallorum inventum, sub remedii *Lithontriptici Anglici* nomine, in usus medicos nuperrimè adhibitum, contra calculos mira præstare, eos dissolvere, dissolutos expellere norunt omnes. Quin etiam in hoc calculi affectu arenulas aut gypsum referente, qui affectus Arthritidis statum & naturam propius attingit, feliciores, inopinatos & promptiores eventus sortiri demonstrat experientia. Hæc eadem sagax rerum magistra, nephritidem & arthritidem iisdem remediis curari posse atque profigari, evincit. Podagricos enim dolores demulcere, arthriticos motus compescere, ipsam insuper arthritidem penitus eradicare. Saponi nonnunquam conigit, quoties ipsius ope calculis laborantes sublevare tentarunt medici: sicque agri duplici morbo interire periclitantes, ex utroque, atque eodem remedio in integrum convalescere. Tanta hujusce remedii virtutes *Poerbaarium* non latere, ubi ipsius laudes extollit. Facit Sapo quod aqua nequit, quod oleo negatur, id præstat. Efficit tunc quod alkali cum periculo potest exequi, quod reliquis salibus nefas. Nullum secum importat periculum, si vacuis visceribus bene dilutus,

motu corporis adjutus, copiâ satis magnâ, sed diuina temporibus poterit. Virtute suâ dissolvente sanguinis motum perficit, liquidiorē lympham reddit, ipsam fixiori sale locupletat, circulatione tandem peractâ in urinis idem fermè reperitur. Externè pariter applicatus, in ulceribus, sinuosis, fistulis pulchra efficit; & in maximis tumôribus, Auctore *Alexandro Tralliano*, Gallicum saponem in topicis adhibere convenit.

V.

TÆDIOSA lactis diatrâ quamplurimos podagræ doloribus immunes fuisse, forsitan objiciet aliquis? Quot exuto lactis jugo crudeliùs excruciantur? Nonnullos etiam reperias qui aperiensibus martialibus arthritidem perdomarunt; at quanta, ubi phlogisticam vim explodunt martialia, capiti imminent pericula? A saponis usu nihil horum metuas; sive hunc mixtum cum melle atque subactum, in opiatæ formâ devorandum jubeas, sive opiatam in idoneo liquore decoctam præscribas hauriendam. Instant, calculos vesicæ in quâ commoratur Sapo radere & dissolvere potest quam facillimè, concreta verò arthritidis penetrare minimè ob indefessum lymphæ motum. Podagricorum nodi, tophi spongiosa materiâ aut gypsum referente formantur: adedque remediis faciliùs dissolvi possunt absque morâ diuturniori; imò circulationis legibus obtemperando, novas eundo vires acquirit Sapo, superandis obicibus sæpiùs occurrit, eos sensim imminuit, faciliùs obliterat, tutiùs destruit. Licet innoxius per se, Medici tamen prudentiam atque sagacitatem requirit; quòd ipsi cum remediis potentioribus est commune. Ætati, temperamento, temporis morbo consulendum est. Caveas ergò in arthritide *anomalâ* liberaliùs largiri, quoties morbum peculiarem procreat aut mentitur. Fibræ nimis tensæ, rigidiore priùs sunt laxandæ, humorum impetus, furores leniendi, sanguinis missionibus extinguendi, nimia eorundem copia *Cataractis* imminuenda, præsens tandem morbus propriis debellandus armis. Cautè etiam te geras oportet sævientibus podagræ paroxysmis: dolores tunc mitigandi, ex arte concilianda quies. His peractis, otiosus tragædiæ spectator naturæ nequidquam committas. Vincendus adhuc latet hostis nova bella prioribus crudeliora mox daturus, nisi hunc diuturno saponis usu expugnaveris atque fugaveris. Nec te insoliti deterreant eventus, naturæ deficienti potiùs, quàm lædenti remedio adscribendi. Laxiorem alvum absorbentibus, coralliis constringes, constrictiorem oleosis lenioribusque purgantibus solves faciliè. Procul hinc illa topicorum farrago in arthriticorum levamen minùs, quàm solatium adhibita. Quot repercutientibus topicis ex morbo sese expedire nitentes, in magnum vitæ discrimen inciderunt? Utere sapone, tumores resolvit; non repercutit, tophos dissolvit, foras attrahit. Absque ulla vasorum eruptione, dilaceratione, obstructione referat. Crassos viscidosque succos ubicumque degentes diluit, attenuat. Arthriticum *miasma* per urinas & sudores movet, agit, avertit. Omnes denique arthritidis causas diruit, expellit.

Ergò Arthritidi Sapo.

DOMINI DOCTORES DISPUTATURI.

M. Ludovicus - Guillelmus le Monnier, Consiliarius Medicus Regis ordinarius, Regique Nosocomii San-Germani in Layâ, Regiarumque Academiarum Franciæ, Londinensis ac Berolinensis Socius.

M. Carolus Dionis.

M. Carolus Payen.

M. Josephus-Exuperius Bertin, Supremi Valachiæ & Moldaviæ Principis Medicus ordinarius, Regiæ Scientiarum Academiæ Socius, & Chirurgiæ Professor.

M. Gedeon de Rabours.

M. Tussanus - Gilbertus Boul-land, Consiliarius Medicus Regis ordinarius in ejus Castellato.

M. Joannes-Ludovicus - Livinus Bande de Lacloy, Bibliothecæ Facultatis Præfatus.

M. Laurentius Ferret.

M. Gaspardus Cochon du Puy, in Arce Maritimâ Rupifortensi Anatomes & Chirurgiæ Professor Regius.

Proponebat Parisiis CAROLUS-FRANCISCUS THEROULDE DE TOULOUSE DE VALLUN, Bajocæus, Eques, Doctor Medicus Cadomenfis, necnon Saluberrimæ Facultatis Medicinæ Parisiensis Baccalaureus, A. R. S. H. 1747, à sextâ ad meridiem.

Typis QUILLAU, Universitatis & Facultatis Medicinæ Typographi, 1747.